



REPUBLIKA E SHQIPËRISË  
AVOKATI I POPULLIT

Mekanizmi Kombëtar për Parandalimin e Torturës  
trajtimin ose dënimit të egër, çnjerëzor ose poshtëruës

Adresa: Bulevardi: "Zhan D'Ark" Nr.2  
Tiranë, Shqipëri

Tel/Fax: +355 4 2380 300/320  
E-mail: [ap@avokatipopullit.gov.al](mailto:ap@avokatipopullit.gov.al)  
[www.avokatipopullit.gov.al](http://www.avokatipopullit.gov.al)

Nr. Prot.  
Nr. Dok. 202200527/2

Tiranë \_\_\_/\_\_\_/2022

**Lënda:** *Rekomandime për inspektimin e bërë në Komisaratin e Policisë Malësi e Madhe.*

**Drejtuar:** Drejtues i Parë Z. Hamdi FJORA  
Drejtor i Drejtorisë Vendore të Policisë

**SHKODËR**

Z. Kujtim GJOKA  
Shef i Komisarimit të Policisë Malësi e Madhe

**KOPLIK**

*Të nderuar,*

Avokati i Popullit, në rolin e Mekanizmit Kombëtar për parandalimin e torturës, trajtimin ose dënimit të egër, çnjerëzor ose poshtëruës, në vijim Mekanizmi Kombëtar, bazuar në nenin 19/1 të ligjit nr.8454, datë 04.02.1999, "Për Avokatin e Popullit", i ndryshuar dhe nenin 81 të ligjit nr. 81/2020, "Për të drejtat dhe trajtimin e të dënuarve me burgim dhe të paraburgosurve", kreu një inspektim në ambientet e privimit të lirisë të personit në Komisaratin e Policisë Malësi e Madhe.

Inspektimi u krye në datën 06.04.2022, sipas Planit të Inspektimit të miratuar nga Avokati i Popullit. Në përbërje të grupit inspektues ishin znj. Gloria Çarkaxhiu dhe znj. Nertila Qafzezi me detyrë Nd/komisioner pranë Mekanizmit Kombëtar.

Inspektimi kishte si qëllim verifikimin e respektimit të standardeve të përcaktuara në ligjin nr.108/2014, "Për Policinë e Shtetit", i ndryshuar, procedurën standarde "Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre", miratuar me Urdhrin e Drejtorit të Përgjithshëm të Policisë së Shtetit nr.925, datë 18.07.2019, procedurën standarde "Rregullat teknike të shoqërimit në mjediset e Policisë së Shtetit", miratuar me Urdhrin e Drejtorit të Përgjithshëm të Policisë së Shtetit nr.938, datë

24.07.2019, si dhe zbatimin e rekomandimeve të Avokatit të Popullit të bëra gjatë inspektimit të mëparshëm.

Institucioni i Avokatit të Popullit, pasi u njoh me konstatimet e grupit inspektues, ka detyrimin kushtetues dhe ligjor t'ju parashtrijë konkluzionet përfundimtare, si më poshtë vijon:

### **Shënime të përgjithshme**

Në përputhje me metodologjinë e zhvillimit të inspektimit në institucionet ku mbahen e trajtohen shtetas që iu është privuar liria, grupi i punës u takua me Shefin e Komisarariatit të Policisë të Malësisë së Madhe z. Kujtim Gjoka i cili u vu në dijeni lidhur me qëllimin e inspektimit.

Në vijim, Shefi i Komisarariatit raportoi për grupin e inspektimit, mbi masat e marra për realizimin e rekomandimeve të lëna nga Institucioni i Avokatit të Popullit në inspektimin e mëparshëm, në lidhje me masat e marra për përmirësimin e ambientit të shoqërimit, sipas kushteve dhe kritereve të përcaktuara në procedurat standarde dhe aktet ndërkombëtare për këtë qëllim.

Grupi punës inspektoi ambientet e shoqërimit, u njoh me regjistrat dhe dokumentacionin ku pasqyrohen të dhënat dhe veprimet e kryera me personat e shoqëruar dhe të arrestuar apo ndaluar, si dhe vizitoi zyrat e punës të punonjësve të policisë të këtij komisaritati.

Nga informacioni i drejtuesit të komisarariatit, si dhe nga verifikimi i zbatimit të rekomandimeve të Institucionit të Avokatit të Popullit në inspektimin e mëparshëm<sup>1</sup>, rezultoi se:

- **Nuk ishte realizuar** rekomandimi, për marrjen e masave të menjëhershme për ndërtimin e ambienteve të shoqërimit sipas kritereve të parashikuara në procedurat standarde “Rregullat teknike të shoqërimit në polici”, miratuar me Urdhrin nr.306, datë 31.03.2016 të Drejtorit të Përgjithshëm të Policisë së Shtetit, duke krijuar ambiente të përshtatshme, dinjitoze, të pajisura me orënditë e nevojshme për qëndrim, të ndara më vete për gra, meshkuj dhe të mitur.
- **Nuk ishte realizuar** rekomandimi, për marrjen e masave të nevojshme për krijimin e ambienteve të përshtatshme ku merren në pyetje shtetasit gjatë kryerjes së veprimeve procedurale nga oficerët e policisë gjyqësore dhe

---

<sup>1</sup> Rekomandimi i dërguar me nr. K4/I24-2 prot., datë 17.04.2019.

instalimin e sistemit të monitorimit me kamera në këto zyra, në korridoret e tyre si dhe në korridorin e ambientit të shoqërimit.

Grupi i punës në vijim inspektoi ambientet e shoqërimit, disa zyra të punonjësve të policisë, si dhe u njoh me dokumentacionin përkatës ku pasqyroheshin veprimet e kryera me personat e shoqëruar dhe të arrestuar apo ndaluar.

Theksojmë se, të gjithë punonjësit e Komisarariatit të Policisë Malësi e Madhe me të cilët kontaktuam u treguan bashkëpunues gjatë komunikimit dhe inspektimit, që zhvilloi grupi inspektues në ambientet e këtij institucioni.

Nga informacioni i grumbulluar në vend gjatë kryerjes së inspektimit, rezultoi se gjendja konkrete e ambienteve të shoqërimit ishte e ngjashme si në inspektimin pararendës, ballafaquar me standardet e parashikuara në aktet normative dhe dokumentet ndërkombëtare, për respektimin e të drejtave të personave të shoqëruar, ndaluar/arrestuar brenda këtyre ambienteve.

Gjithashtu u vu re se Komisaritati i Policisë Malësi e Madhe është i përqendruar në një godinë të vjetër ekzistuese e cila është shumë e amortizuar dhe nuk ofron kushte të denja pune edhe për punonjësit e këtij institucioni çka kërkon domosdoshmërisht realizimin e investimeve për rikonstruksionin e saj në vijim.

Por nga ana tjetër u konstatua se institucioni i Komisarariatit të Policisë Malësi e Madhe kishte bërë përpjekjet e nevojshme duke ju drejtuar organeve eprore me kërkesa për të mundësuar realizimin e investimeve në këtë institucion në kuadrin e përmirësimit të ambienteve të shoqërimit për të garantuar respektimin e të drejtave të personave të shoqëruar.

Në përfundim të inspektimit grupi monitorues konstatoi se, megjithëse në Komisariatin e Policisë Malësi e Madhe ishin marrë disa masa për përmirësimin e standardeve lidhur me të drejtat ligjore të personave të shoqëruar dhe të personave të arrestuar/ndaluar, vazhdonin të ishin të pranishme disa problematika dhe më konkretisht:

### **Ambientet e shoqërimit dhe kushtet e tyre**

Në Komisariatin e Policisë Malësi e Madhe ambientet e shoqërimit nuk ishin realizuar plotësisht sipas parashikimeve të bëra në ligjin nr. 108/2014, “*Për Policinë e Shtetit*”<sup>2</sup>, i ndryshuar dhe procedurës standarde “*Rregullat teknike të shoqërimit*

---

<sup>2</sup> Nuk plotësoheshin kushtet si vijon: Mjediset/ambientet të jenë të ndara më vete për persona të rritur, gra dhe të mitur. Këto mjedise të jenë brenda ndërtesave të drejtorive, komisariateve dhe stacioneve të policisë. Mjediset të jenë me sipërfaqe dhe hapësirë të bollshme për qëndrimin e personave të jenë të

*në mjediset e Policisë së Shtetit*”, miratuar me Urdhrin e Drejtorit të Përgjithshëm të Policisë së Shtetit nr. 938, datë 24.07.2019, ku parashikohet se dhomat e shoqërimit duhet të jenë me sipërfaqe dhe hapësira të bollshme për qëndrim, si dhe të ndara më vete për gratë, meshkujt madhorë dhe të miturit.<sup>3</sup>

Në Komisarlatin e Policisë Malësi e Madhe ambientet e shoqërimit ishin përshtatur duke shfrytëzuar si dhomë shoqërimi vetëm një nga ambientet ekzistuese të godinës për meshkujt madhorë dhe gratë dhe të miturit mbaheshin në dhomat e oficerëve të policisë.

Në këtë Komisariat sërish kishte vetëm një dhomë shoqërimi, e cila ndodhej në katin e parë të ndërtesës së Komisarlatit. Dhoma ishte me përmasa 4 x 2m, me dritare e cila lejonte ajrim dhe ndriçim natyral, por mungonin xhamat të cilët ishin dëmtuar. Dhoma dhe kishte ndriçim nga rrjeti elektrik. Ajo nuk ishte e pastër dhe as e lysterishtazi dhe nuk ishte e pajisur me orenditë e nevojshme, si tavolinë dhe karrige për qëndrimin ulur të shtetasve të shoqëruar madhorë meshkuj. Dhoma e shoqërimit nuk kishte sistem ngrohjeje. Ajo ishte jo funksionale<sup>4</sup> por nuk kishte një dokumentim për mbylljen e saj. Nga drejtuesi i këtij Komisarlati na u bë me dije se personat e shoqëruar mbaheshin në zyrat e punës deri sa mbaronin procedurat e verifikimit dhe të pyetjes së tyre dhe në vijim ata dërgoheshin në Komisarlatin e Policisë Shkodër. Për Në rastet kur në Komisarlat shoqëroheshin gra dhe të mitur ndiqej e njëjta procedurë. Ndërkohë që tualeti ndodhej në katin e sipërm dhe përdorej si nga të shoqëruarit ashtu edhe nga administrata.

Në korridorin e ambientit të shoqërimit nuk ishte instaluar sistem monitorimi me kamera për vëzhgimin e veprimeve që kryheshin me të shoqëruarit. Në kohën e kryerjes së inspektimit nuk kishte persona të shoqëruar. Ndërsa për periudhën Janar - Prill 2022 në regjistër ishin evidentuar të dhënat për 11 persona të shoqëruar në mjediset e këtij komisarlati.

---

lyera, të pastra nga higjienike si dhe të kenë dritare me përmasa të tilla që të krijojnë mundësi për realizimin e ajrimit e ndriçimit të plotë natyral. Në mjediset ku pyetet i shoqëruari të kenë të vendosura pajisje e orendi pune për specialistët e ndihmës specialistët e policisë si; tavolina e karrige si dhe stola për qëndrimin ulur të shtetasve të shoqëruar, të cilat të jenë të fiksuara dhe të pa lëvizshme. Brenda këtyre ambienteve ose ngjitur me to, të ketë tualete, të ndara për gra dhe meshkuj, të pajisur me mjetet e domosdoshme për këtë qëllim.

<sup>3</sup> *Kreu VII, pika 4 e procedurës standarde “Rregullat teknike të shoqërimit në mjediset e Policisë së Shtetit”.*

<sup>4</sup> Kjo për arsye se nuk plotësonte të gjitha kushtet e parashikuara në përputhje me procedurën standarde “Rregullat teknike të shoqërimit në mjediset e Policisë së Shtetit”, miratuar me Urdhrin e Drejtorit të Përgjithshëm të Policisë së Shtetit nr. 938, datë 24.07.2019, përkatësisht Kreu VII, Procedurat standarde: “Rregullat teknike të shoqërimit në polici”, neni 4 “Kushtet e mbajtjes dhe Siguria për personat e shoqëruar”, gërmat “c” dhe “e”.

## **Ambientet e sigurisë dhe kushtet e tyre**

Në Komisarlatin e Policisë Malësi e Madhe nuk kishte ambiente të sigurisë dhe personat e arrestuar/ndaluar dërgoheshin në dhomat e sigurisë të Komisarlatit të Policisë Shkodër.

## **Regjistri i personave të shoqëruar, ndaluar/arrestuar si dhe trajtimi i të shoqëruarve, ndaluarve/arrestuarve gjatë veprimeve që kryen policia**

Gjatë inspektimit u konstatua se në Komisarlatin e Policisë Malësi e Madhe, “Regjistri i evidentimit të të dhënave për personat e shoqëruar” **nuk** ishte i tipit “Model nr. 1” konform procedurës standarde “*Rregullat teknike të shoqërimit në mjediset e Policisë së Shtetit*”, miratuar me Urdhrin e Drejtorit të Përgjithshëm të Policisë së Shtetit nr. 938, datë 24.07.2019. Personat e shoqëruar regjistroheshin në një regjistër me format të ndryshëm nga ai i miratuar në aktin e mësipërm.

Evidentohet se modeli i ri i regjistrit është miratuar në vitin 2019 dhe është neglizhencë e papranueshme mbajtja e regjistrave sipas formatit të vjetër.

Të gjithë personat e shoqëruar në organin e policisë sipas dispozitave të ligjit nr. 108/2014 “Për Policinë e Shtetit”, i ndryshuar regjistroheshin në këtë regjistër nga punonjësit e zyrës së informacionit. Nga këqyrja e këtij regjistri rezultoi se: Koha e qëndrimit në gjendje shoqërimi të shtetasve ishte e ndryshme nga 1 deri në 10 orë në raste të veçanta.<sup>5</sup>

Gjithashtu, në këtë Komisarlat administrohej regjistër për të miturit të shoqëruar në konflikt me ligjin ku evidentoheshin të gjithë rastet e të miturve të shoqëruar në këto ambiente, në të cilin u konstatua se **nuk ishte evidentuar asnjë rast dhe regjistri ishte i sekretuar.**

Ndërkohë u konstatua se në këtë Komisarlat **nuk kishte** edhe regjistër për evidentimin e kërkesë/ankesave të personave të shoqëruar, të arrestuar dhe të ndaluar, sikurse parashikohet në nenin 115 të ligjit nr. 108/2014 “Për Policinë e Shtetit”, i ndryshuar, dhe për pasojë ishte e pamundur të evidentoheshin kërkesat apo ankesat e personave të shoqëruar në këtë Komisarlat.

## **Ambientet e intervistimit**

Në Komisarlatin e Policisë Malësi e Madhe oficerët e policisë gjyqësore i kryenin veprimet procedurale me shtetasit në zyrat e punës së tyre. Këto zyra nuk ishin të

---

<sup>5</sup> *Kreu VII, Procedurat standarde: “Rregullat teknike të shoqërimit në polici”, miratuar me Urdhrin nr. 938, datë 24.07.2019 të Drejtorit të Përgjithshëm të Policisë së Shtetit.*

monitoruara dhe ndërkohë në këtë organ nuk kishte ambiente të veçanta intervistimi të monitoruara me kamera gjatë kryerjes së veprimeve procedurale nga oficerët e policisë gjyqësore.

Lidhur me këto fakte Avokati i Popullit nisur edhe nga inspektimi i mëparshëm ka rekomanduar marrjen e masave për krijimin e zyrave të dedikuara ku merren në pyetje shtetasit gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera në këto zyra por është konstatuar se sërish ky i fundit nuk është plotësuar<sup>6</sup>.

Procesi i monitorimit filmik gjatë marrjes në pyetje të personave të shoqëruar është një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ndaluarve apo arrestuarve, ashtu dhe nga vetë punonjësit e policisë së shtetit.

Nga monitorimi që u bë në disa prej zyrave të punonjësve të policisë, nuk u gjetën sende, prania e të cilave të ekspozonte dhunë tek personat me të cilët ata kryenin veprime procedurale.

### **Ndihma juridike dhe psikologjike**

Nga pyetja e punonjësve të policisë rezultoi se në rastet kur të ndaluarit/arrestuarit madhorë të cilët nuk kishin mundësi financiare për të pajtuar avokat privat dhe kërkonin ndihmë juridike, atyre iu sigurohej mbrojtja me avokat sipas një liste që disponohej në institucion.

Në rastet kur të ndaluarit/arrestuarit ishin të mitur, veprimet procedurale kryheshin në praninë e detyrueshme të avokatit mbrojtës të caktuar kryesisht dhe të psikologut. Avokatët siguroheshin nga lista e avokatëve të dërguar nga organi i prokurorisë. Ndërsa psikologu sigurohej në bashkëpunim me shkollat e mesme të qytetit të Koplikut.

Gjatë inspektimit u konstatua se në korridoret e godinës, si dhe në dhomën e shoqërimit të këtij komisariati ishin afishuar postera me të drejtat ligjore të personave të shoqëruar në organin e policisë dhe të personave të ndaluar/arrestuar.

---

<sup>6</sup> “Një sistem i monitorimit të vazhdueshëm i standarteve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe/video). Duhet të kërkohej që të regjistrohet në mënyrë sistematike koha kur ka filluar dhe mbaruar intervista, ndonjë kërkesë të bërë nga i ndaluari gjatë intervistës, si dhe të personave të pranishëm gjatë çdo interviste.” Raporti i CPT-së për Armeninë: CPT/Inf (2016) 31 [par.20]

U konstatua se në këtë komisariat zbatohet detyrimi ligjor i parashikuar në nenin 109/5 dhe 122/5 të ligjit nr. 108/2014 “Për Policinë e Shtetit”, i ndryshuar, si dhe në kapitullin VII, pika a.3.4 të procedurave standarde për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë që ishin ngarkuar me detyrën e kryerjes së verifikimit dhe trajtimin e çështjes përkatëse.

U evidentuan disa praktika të njëpasnjëshme ku në përfundim të procedurave dhe veprimeve të kryera nga punonjësit e policisë në Komisaratin e Policisë Malësi e Madhe, mbaheshin procesverbalet përkatëse ku një kopje e të cilit firmosej dhe i jepej personit të shoqëruar.

Gjithashtu, grupi inspektimit u informua se personat e shoqëruar/ndaluar njihen verbalisht me të drejtat e tyre që nga fillimi i privimit të lirisë, mirëpo karta e të drejtave nuk i jepet çdo personi të shoqëruar/ndaluar, që në momentin e hyrjes në ambientet e Komisarimit për të garantuar njohjen e të drejtave që nga fillimi i privimit të lirisë si një detyrim ky i cili i është ngarkuar edhe nga Komiteti për Parandalimin e Torturës i Këshillit të Evropës<sup>7</sup>. Ky veprim vjen në përputhje edhe me parashikimin në nenin 28 pika 1 të Kushtetutës së Republikës së Shqipërisë.

Për sa më sipër dhe me qëllim zgjidhjen e problemeve të konstatuara gjatë këtij inspektimi, bazuar në pikën 3 të nenit 63 të Kushtetutës ku parashikohet se: “*Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike*” dhe në bazë të nenit 21/b të ligjit nr. 8454 dt.04.02.1999 “*Për Avokatin e Popullit*”, i ndryshuar, ku përcaktohet se: “*Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive*”,

## **REKOMANDOJMË:**

1. Marrjen e masave të menjëhershme për rikonstrukcionin dhe realizimin e investimeve në Komisaratin e Policisë Malësi e Madhe për të garantuar kushte të përshtatshme pune për punonjësit e policisë së këtij institucioni ashtu edhe

---

<sup>7</sup> KPT u bën thirrje autoriteteve shqiptare të ndërmarrin hapa për të siguruar që personat e ndaluar nga policia të jenë plotësisht të informuar për të drejtat e tyre që nga fillimi i heqjes së lirisë (d.m.th., që nga momenti kur ata janë të detyruar të qëndrojnë në polici). Kjo duhet të sigurohet me ofrimin e informacionit të qartë verbal që në fillim, i cili do të plotësohet sa më parë (pra menjëherë pas mbërritjes në ambientet e policisë) duke siguruar Kartën e të Drejtave të sipërpërmendur. Personave në fjalë duhet t'u kërkohet të nënshkruajnë një deklaratë që vërteton se kanë marrë një kopje të Kartës së të Drejtave.  
Konsulto: <https://rm.coe.int/168097986b>

për të krijuar ambiente brenda standardeve për ofrimin e shërbimeve për qytetarët.

2. Marrjen e masave të menjëhershme për ndërtimin e dhomës së shoqërimit në Komisarlatin e Policisë Malësi e Madhe, sipas kritereve të parashikuara në Kreun VII, pika 4 të procedurave standarde “*Rregullat teknike të shoqërimit në polici*”, miratuar me Urdhrin nr. 938, dt. 24.07.2019 të Drejtorit të Përgjithshëm të Policisë së Shtetit duke përfshirë në të dhe ndërtimin e një dhome shoqërimi për gra dhe një dhome shoqërimi për të miturit në konflikt me ligjin.
3. Marrjen e masave të menjëhershme për vënien në funksion të dhomës së shoqërimit me vendosjen e xhamave në dritaren e dhomës të shoqërimit, lyerjen e dezinfektimin, si dhe kompletimin e saj me orenditë e nevojshme si tavolina dhe karrige për të mundësuar qëndrimin ulur të personave të shoqëruar.
4. Marrjen e masave të menjëhershme për pajisjen e Komisarlatit Malësi e Madhe me “*Regjistri i evidentimit të të dhënave për personat e shoqëruar*” sipas tipit “*Model nr.1*”, konform procedurave standarde “*Rregullat teknike të shoqërimit në polici*”, miratuar me Urdhrin nr.938 datë 24.07.2019 të Drejtorit të Përgjithshëm të Policisë së Shtetit.
5. Marrjen e masave të menjëhershme për pajisjen e komisarlatit me një regjistër për evidentimin e kërkesë/ankesave të personave të shoqëruar, të arrestuar dhe të ndaluar sikurse parashikohet në nenin 115 të ligjit nr. 108/2014 “*Për Policinë e Shtetit*”, i ndryshuar.
6. Marrjen e masave të menjëhershme për instalimin e sistemit të monitorimit me kamera vëzhguese në ambientin e dhomës të shoqërimit në Komisarlatin e Policisë Malësi e Madhe.
7. Marrjen e masave të nevojshme për krijimin e zyrave ku merren në pyetje shtetasit gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera në këto zyra.
8. Marrjen e masave të nevojshme për krijimin e zyrave të posaçme për intervistim me persona të mitur, duke ofruar një ambient të përshtatshëm që duhet të jetë i rregulluar në mënyrë të posaçme për zhvillimin e bisedave me të miturit.
9. Marrjen e masave për të vendosur posterat e rinj me të drejtat dhe kartën e të drejtave të personave që shoqërohen apo ndalohen në ambientet e komisarlateve, në vende që të jenë të aksesueshëm nga këta persona.



10. Marrjen e masave të menjëhershme për dhënien e kartës së të drejtave personave të shoqëruar apo ndaluar në momentin e hyrjes së tyre në komisariat.
11. Marrjen e masave të menjëhershme për sigurimin e sistemit të ngrohjes ose vendosjen e pajisjeve elektrike në dhomën e shoqërimit, për ngrohjen e këtyre ambienteve kryesisht në periudhën e dimrit.
12. Marrjen e masave për mirëmbajtjen e garantimin të kushteve higjieno-sanitare dhe pastërtisë së tualetit dhe të ambienteve të Komisarariatit të Policisë Malësi e Madhe, si dhe lyerjen dhe dezinfektimi të vazhdueshëm të tyre.
13. Trajnim të punonjësve se nga kontrolli u evidentuan mangësi në kuptimin e detyrimeve të tyre procedurale.

Për qëndrimin që do të mbani dhe masat që do të merrni në zbatim të këtij rekomandimi, të vihemi në dijeni brenda afatit 30 ditor sipas nenit 22 të ligjit nr. 8454, datë 04.02.1999 “Për Avokatin e Popullit”, i ndryshuar.

*Duke besuar në mirëkuptimin dhe bashkëpunimin tuaj.*

**KOMISIONER**

**Ahmet PRENÇI**